

皆斬以尊謀卑減等科斷至於已殺以故殺科奴婢  
既卑且賤謀與子孫同刑皆以治人道之變也

### 殺死姦夫

○凡妻妾與人姦通而於姦所親獲姦夫姦婦登時殺死者  
勿論若止殺死姦夫姦婦者依律斷罪從夫嫁賣

疏議曰凡人之或妻或妾與人通姦而本夫於姦所親  
獲姦夫姦婦登時於姦所之時即殺之者勿論其殺  
人之罪若止殺死姦夫者奸婦依和姦律斷罪聽從  
本夫或嫁或賣

問曰登時與夜無故入人家登時殺死同否

答曰夜無故入人家主家登時殺死者以其有好謀之

心恐致拒捕登時殺死故勿論也若已就拘執則不  
患其拒捕矣而擅殺之是自專也故減凡鬪二等今  
奸夫亦係奸謀之人若登時不即殺死亦恐拒捕故  
殺之者亦無罪若已就拘執亦不患其拒捕矣告逸  
官司自有本罪豈得擅殺之哉此本條雖無已就拘  
執減凡鬪二等之文以登時殺死推之亦當同論

○其妻妾因姦同謀殺死親夫者凌遲處死姦夫處斬若姦夫  
自殺其夫者姦婦雖不知情絞

疏議曰其妻妾因與人通姦而與姦夫同謀殺死親夫  
者奸婦凌遲處死奸夫處斬若奸夫因惡親夫不令  
奸婦得知而自行謀殺之者奸夫處斬奸婦雖不知

情以其因奸而致殺故亦處絞

謹詳律意為人之婦而淫通外人是絕夫婦之義矣淫人妻妾而恬不知懼是亂人倫之常矣故於行奸之所本夫捕而殺之不惟防拒敵之害亦且誅淫亂之跡才治其罪原其心不能自已也設若止殺姦夫奸婦治罪嫁賣而無願離者聽之文審其勢不得不離也其或奸夫奸婦通同殺死親夫則是滅絕人道者矣故婦處極典男受斬刑若奸夫自殺親夫奸婦將何為婦亦坐絞罪以正其因則姦淫之徒知所警懼矣

謀殺故失父母